

ام تحاچي گبر ابنها استشهد و ورث حزنها
انكسر ظهري وانصدع لكن الراس ارتفع
بطيحتك هاي

.....
كبرت عيني ارد اشوفك يكبر ابفعله الرجل
وچانت اشما عيني تكبر تنترس خير الفعل
عين وسط اعيوني طگت تنزف ادموع وتهل
من شفت گاع الوطيه ويالگمر لمها الشمل
ومن طفه نورك يغالي..... وحشه صارتلي الليالي
ونورك بكل ظلمه شع لكن الراس ارتفع
بطيحتك هاي

.....
من سمعت الدنيا ترعد والوكت يمطر محن
بلا سگف دين الله چنه وكل حياطينه
انحنن
ألا من ناصر ينادي يصون حرمة هالوطن
فزعت انجوم الثريا وشتت غيم الفتن
وانت نجمه امن الثريا ومن رحت من بين اديه
گلبي من صدري انخلع لكن الراس ارتفع

بطيحتك هاي

.....

يمه ادري الغيره عندك كون تدرسها الأمم
الحرّة من تفكّد خدرها عارها اعله اهل الشيم
الجبل لو كص رجله وادي الغيم يذبح بالقمم
الكاع من تنزع سترها لازم يغطيها دم
ومن صحت فدوه لخواتي الشمس چا لبست عباتي
بصوتك العالم خشع لكن الراس ارتفع

بطيحتك هاي

.....

يبني يربات المضاييف هالوطن مبني بكصب
ايشبع ضيوف السياسة والمعازيب الشعب
شيله لو طبتله تنخه يشيل بيرغ للغضب
لو يرد حيف التّخت لو يوج مثل الحطب
وشيلة العافوها اهلها عمرك انطيته لجلها
راح عمرك ما رجع لكن الراس ارتفع

بطيحتك هاي

.....

يمه احس الزهره يمي لمن انعى اعله الكبر

يلي ضحيت ابشبابك من رجع لينا الشمر
عفيه يربات المناير گمت بدموعي افتخر
بيّضت وجهي ويليله والعقيله ام الخدر
ورمله بالتفگد ضناها تدري يا جمر الجواها
مثل گلبي المنفجع لكن الراس ارتفع
بطيحتك هاي

.....
علي إسماعيل الشبلي